



NAMMINERSORNEQ PISUSSAAFFILIIVOQ

Siumup siulittaasuutut inuiaqatigut tamaasa ukiortaami pilluaquakka, qanortoq ukioq nutaaq aallarnigarput tamanut ajunngitsumik iluanaarfiusumillu kinguneqarili.

Ukiumut nutaamut ikaarsarneq inuiaqatigiinnut pisussaaffiliisarpoq kingumut qivia-laarnissamut. Inuttut imaluunniit inuiaqatigiittut – tamarmik pingaartillugit nalilersugassat.

Kingumut qiviarneq tassaavoq naliliiniarnermi pitsaasunik pitsaanngitsunillu aqqu-saagaqarsimanerup alloriarnissamut tikkuussisussai – tamannalu inuiattut aammalumi inuttut ataasiakkaatut tamatta pisaritigu alloriarneq pitsaanerusoq angusassarlu anginerusoq angujumallugu.

Ukiut 30-iinnaat qaangiussimalerput Namminersornerup Oqartussaanerata eqqunneqarnerit, taamaattoq maanna inuiattut ima nammineersinnaassuseqarneq misigissutsigit, anguniakkatigut aammalu siunnerfigisatsigut annertusisimalertigaaq maanna Namminersorneq eqqunneqareerpoq aammalu nunatta naamminiilivissinnaaneranut suliniarneq inatsisitigut tunngaviusumik inatsisiliorsinnaalerluta ammasumik namminiilivissinnaaneq oqaluuseralutigu.

Inuiaqatigiit Kalaallit taama annertutigusumik piomassuseqaratta, nammineq ingerlajumangatta aammalu taama inuiattut nuimatigisumik anguniagaqaratta tulluusimaarnartuuvoq – pilluarta!

Oqaluttuarisaanermi aatsaat tamaa ilinniarsimassutsikkut taama qaffasitsigisumik angusaqarpugut, oqaluttuarisaanermi aatsaat taama amerlatigisut namminerisamik ineqalerlutillu illoqalerput, oqaluttuarisaanermi aatsaat taama siunissamut aningaasarsiornikkut periarfissatigut atugarissaartigaagut, oqaluttuarisaanermilu aatsaat taama periarfissat atorluarnissaannik immitsinnut piomaffiginissaq peqataanissamillu piomaffigineqarneq annertutigaaq.

Namminersornerup aallartilluarnissaa aaliangiisuuvoq.

Aaliangiisuuvoq innuttaasut tamatta Namminersornermut piginneqataasutut misigisimanissarput, aaliangiisuuvoq nunaqarfinniikkutta, kommunerujussuarniikkutta, illoqarfinniikkutta avinngarusimasuniikkuttaluunniit tamatta pingaartinneqarluta aammalu naligiittut isigineqarluta peqataaninneqarnissarput.

Inuiqatigiinni innuttaasugut tamatta sumiikkaluaruttaluuniit periarfissat pisinnaati-taaffiillu assigiitsut atugassarisariaqarpagut – tamannalu qinikkatut sulinitsigut qulakkiingassatta pingaarnersaattut suliassaraarput.

Namminersorneq pisussaaffiliivoq.

Namminersorneq tassaavoq inuiaqatigiittut tamatta pigisarput, tamattalu piginneqataaffigalugu pigisassarput.

Namminersorneq taassaavoq ukiuni aggersuni ataatsimoorfigalutigu, ilusilersueqataaffigalutigu, piginneqataaffigalutigu pisassarput minnerunngitsumillu nunatta namminiilivinnissaanut piareersarfik pitsaanerpaatut atugassarput.

Ilusilersorneqassaarlu tamatta peqataanitsigut, akisussaaqataanitsigut minnerunngitsumillu suliassamik kivitseqataanitsigut.

Siumumit Namminersornerup pitsaasumik inuiaqatigiinnut sunniuteqarnissaa aallartilluarnissaalu qulakkeerniarparput.

Inuiaqatigiit imminut pilersortut tassaapput inuussutissarsiut sunaluunniit ingerlanne-rani imminut pilersornermik nassatalik - illoqarfimmiuugaluarpata nunaqarfimmiuugaluartaluunniit, assiiginngisinneqanngitsut.

Aalisartuugutta, piniartuugutta, aatsitassarsiorfimmi suliaqartuugutta, inulerisuugutta, kulturilerisuugutta, ilinniagartuujugutta, sulisartuugutta, timersortartuugutta, namminersortuugutta – tamatta immikkut imminut napatilluta isumalluuteqaratalu inuussutissarsiortuusugut.

Naalackersuinikkut sulinitsinni siunnerfik ersarissaq aallaaviusuassaaq tassalu innuttaasut atugaat ukioq kingullernit pitsaanerusumik angusaqarfigiumallugu atugassaqartisinarluni suliuarneq. Iluatsittumik sularineqartut ingerlanneqassapput iluatsisimanningsullu tulluarsarneqassallutik tamannalu tamanut atuuppoq. Naalackersuinikkut innuttatsinnut ineriartortitsisinnaanermut atugassiissutigineqartut ineriartorniaraluarnermut ajoqusiisussat pakkersimaarniartariaqarput inuiaqatigiit ineriartorniarerannut annertuumik innarliisussaammata.

Allatut sulineq kinguariarneruvoq akuersaarneqarsinnaanngitsoq inuiattullu kingumut alloriarnertut taasarialik!

Inuiqatigiinni ajornartorsiutivut ammasumik oqallisigalugit peqataatitsinikkullu qaangerniagassaraavut.

Imigassamik ajornartorsiuteqarneq, ikiaroorntumik ajornartorsiuteqarneq, inooqatigiinnikkut ajornartorsiuteqarneq, kinguaassiuutitigut atonerluinermik ajornartorsiuteqarneq, aningaasanoorajunnermik ajornartorsiuteqarneq – tassaapput ukiumi nu-

taami angusaqarfiusumik ajornartorsiutit annikinnerulersinneqarnissaannik suliniarfissaq. Suliniarfissaq inuiattut ajornartorsiutitta nukiit tamaasa atorneratigut annikillisaaffissarpoq.

Suliniarnek inuusuttunik suleqateqarnikkut pinaveersaartitsinikkullu anguneqassaaq.

Inuusuttut tassaapput siunissami namminerisamik ilaqutaqalersussat, inuusuttut tassaapput meerartatsinnik qummut isigineqarlutik maligassiueqataasussat, inuusuttut tassaapput kinguaariit tulliisa akisussaaffimmik tigusinissami tullinnguuttut.

Inuusuttut tassaapput suleqatissavut qaninnerpaat aammalu sulinermi ingerlaqatissavut. Siumumi inuusuttut suleqataalluarnissai qularutiginnilarput isumaqarpugullu inuusuttortaqartugut ukiup nutaap aallartitatta suli pitsaanerusumik angusaqarnissatinnut kivitsisussat.

Inuusuttut tassaapput siunissaminnik namminnek qanoq inuuneqarnissaminnik toqqaasussat, ilusilersuisussat, nutaamik misilittagaqalersussat minnerunngitsumillu nunap massuma siunissami qanoq isikkoqarnissaanik sanarfeqataasussat.

Inuusuttut tassaapput inersimasut aammalu meeqqat akornanni ataqatigiissaaqataasussat aammalu qulakkeerinnegataasussat siunnerfiit pitsaasumik tamanit peqataaffigineqarsinnaaneramik qulakkeerinnittussat.

Inuiattut imminut napatinnissaq anguneqarsinnaavoq inuiattut siunissarput tamanit peqataaffigineqartumik ilusilersorneqarpat. Qulaaniit naalakkiinerit pinnagit sumiik-kaluartulluunniit siunissamut neriuartumik ingerlariaqqinnissaanni oqaloqatiginninnikkut, isumasiuinikkut, ilusilersueqatigiinnermi minnerunngitsumillu allorialermermi peqatigiumanninneq suleqatiserinninnerlu.

Siumumit isumaqarpugut Inuiaat Kalaallit aatsaat ataatsimoorfeqarnissamik pisariaqartitsigisugut.

Ataatsimoorfigisigu Namminersorneq.
Ataatsimoorfigisigu siunissatta ilusilersornera.
Ataatsimoorfigisigu alloriaqqinnissaq.

Ataatsimoorfigitigu inuiattut nakuussutivut, inuattut oqaatsivut, inuattut alloriaqqikkumassuseqarnerput inuiattullu nammineerumassuseqarnerput!

Siumumi ukioq nutaaq aallarnigarput angusaqarfiulluassasoq qularutiginnilarput.

Siumumi nukissat piumasuserlu amingaatineqanngillat.
Inuiaqatigiit sullikkumallugit aammalu inuiaqatigiittut atukkatta pitsanngortinniarnissaannut suliumassuseqarnerput taama annertutigaaq.

Siumumi nukik, sulerusussuseq piumassuseqarnerlu suliniarnitsinni qitiusuarput tas-
saagatta inuiaqatigiit Kalallit pitsaanagerusumik ukiut tamaasa atugaqalernissaannik
sorsuuteqarluta sullittuusugut – tamaannalu ukiumi nutaami aamma ingerlateqqis-
suarput suliassarpullu qilanaaraarput ataatsimoorfigalugulu.

Siumumit inuiaqatigut tamarmik ukiortaami pilluaqqugut suleqatiseraatsigillu inuiat-
tut angusassatta pitsaasut angutserlugit suliniarnitsinni kivitseqataanissassinnut, pi-
ginneqataanissassinnut suleqataanissassinnullu – Namminersorneq ataatsimoorfigalu-
tigu pitsaasumik aallartitsigu!